



Komunikadu Imprensa
25 Janeiru 2022
Parlamentu Nasionál

JSMP apresia ho esforsu deputadu proponente sira ne'ebé inisia ona esbosu alterasaun Estatutu DP no Lei ba SFJJ atu sai instituisaun independente

Komisaun A Parlamentu Nasionál (PN) iha 19 Janeiru 2022, konsege realiza audénsia dahuluk ho entidade relevante sira iha setór justisa hodi rona sira nia hanoin kona-ba esbosu alterasaun ba Estatutu Defensória Pública (DP) no Lei ba Sentru Formasaun Jurídika no Judisiária (SFJJ).

Iha intervensaun, deputada proponente distinta deputada Carmelita C. Moniz esplika kona-ba intensaun husi projetu lei rua ne'e mak atu kompleta Lei Organizasaun Judisiária ne'ebé PN aprova ona no Prezidente Repúblika mós promulga ona. Lei rua ne'e mós parte ida husi polítika reforma setór judisiáriu nian no tanba ne'e deputadu sira haree nia importánsia mak tenke separa ona instituisaun rua ne'e husi Ministériu Justisa hodi sira bele hala'ó sira nia kna'ar ho di'ak atu bele ajuda hadi'ak qualidade justisa iha Timor Leste.

“JSMP apresia as tebes ho esforsu deputadu proponente sira ne'ebé fó prioridade ba inisia projetu lei rua ne'e no mós Komisaun A ne'ebé tau ona iha prioridade hodi halo apresiasaun inisial ba projetu lei rua ne'e atu bele hetan informasaun ruma husi entidade relevante sira setór justisa nian antes diskute no aprova lei sira ne'e hodi sai instituisaun independente tuir JSMP nia rekomendasaun durante ne'e”, dehan diretora JSMP, Ana Paula Marçal.

JSMP mós rekomenda ba deputadu sira atu ho projetu lei foun ba Estatutu Defensória Pública nian la'ós atu halo alterasaun ba Dekreitu-Lei Nú.10/2017 kona-ba Estatutu Defensória Pública, maibé hodi halo revogasaun. Nune'e, Defensoria Pública bele transforma ona nu'udar instituisaun públiku independente ida ne'ebé separa husi Ministériu Justisa nia tutela.

JSMP mós konkorda atu separa instituisaun rua ne'e, Defensória Pública no Sentru Formasaun Jurídika no Judisiária husi tetula Ministériu Justisa nian atu sai instituisaun ne'ebé independente hodi bele fasilita sira atu bele hala'ó sira nia serbisu ho di'ak no qualidade tuir planu estratéjia ba setór justisa nian iha ba tinan 2011-2025.¹ Hanesan

¹ Bele asesu info kompleitu iha pagina 23 no pagina 28 planu estratejia setór justisa 2011-2025 iha website:
http://www.mj.gov.tl/files/JSSP_TETUM.pdf

JSMP nia rekomendasaun antes iha relatóriu anual setór justisa 2018² ne'ebé JSMP kestiona kona-ba independénsia finanseiru husi Defensoria Públiku no rekomenda atu finansiametu Defensoria Públiku tenke independénsia ona no finansiamete la depende ba Ministériu Justisa nune'e sira bele jere rasik sira nia rekursu bazeia ba sira ninia nesesidade rasik ligadu ho facilidade, orsamentu hodi asegura qualidade prestasaun serbisu no antedimentu ba povu iha asesu ba justisa formál iha Timor-Leste³.

Entidade sira ne'ebé partisipa iha diskusaun ba apresisaun esbosu lei rua ne'e konkorda atu separa instituisaun rua ne'e husi Ministériu Justisa no konsidera importante atu estabelese lei foun ba Sentru Formasaun Jurídika no Judisiária ba programasaun formasaun iha setór justisa. Instituisaun sira ne'ebé partisipa iha audénsia ne'e mak Tribunál, Ministériu Públiku, Defensoria Públiku no Diretór Sentru Formasaun Jurídiku no Judisiária.

Entretantu proponente ba projetu lei rua ne'e mak distintu deputadu sira mak hanesan Sra. Carmelita C. Moniz (CNRT), Sr. Arão Noe J. C Amaral (CNRT), Sr. Patrocino F. dos Reis (CNRT), Sr. Francisco David Xavier Carlos (UDT), Sr. Joaquim dos Santos Boraluli (Fretilin), Sr. Jose Pacheco Soares (Fretilin), Sr. Francisco M. Branco (Fretilin) no Sr. Dario Madeira (Fretilin).

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Website: <http://jsmp.tl>
www.jsmp.tl

² Bele asesu iha JSMP nia relatóriu anual setór justisa 2018, pájina 66 iha website JSMP nain : <https://jsmp.tl/wp-content/uploads/OJS-2018-report-TETUM.pdf>

³ Bele asesu informasaun kompleitu sobre orsamentu defensoria Públiku nian iha pagina 23 relatoriu annual JSMP 2020 iha website JSMP: https://jsmp.tl/wp-content/uploads/Relatoriu-OJS-2020_FINAL.pdf